



夢澤集卷之二

詩

詠懷三十四首

兩儀立樞要萬事具紀綱
智士運機權一童驅百羊
羽重金或輕尺短寸有長
壯夫苟失據反為豎子傷
獨爾引六鼇纖繳連雙鶴
操持貴不謬得失詎有常
始悟制人術豈在多與強

其二

明月至無煤朱草敷庭陰
倉卒拔劍前眄睠愁予心
豈獨闇嘉祥隱禍恐見侵
忌廢忍不攫負嬰甘棄金

至貴有不欲天屬誠所欽美疾雖可甘徒使百毒淫
其三

昔有亢桑子寄身畏壘居臣妾屏仁知甘與朴藥俱
三年國大穰歲計誠有餘問并戴其潤謀欲俎豆予
聞之悵不憚奮起逃空虛豐施不食報道化超黃虞
季葉驚功利畫挈於一隅

其四

人生本殊方神範各有宜參錯獲一致妄鑿垂天倪
鳧脛續則瘁鶴脛截則悲拇駢決則憂指枝嚙則啼
惡劣不假益羨濫豈俟虧紛彼便嬖子作意相追隨

智殫力云匱成理曷能移

其五

狙捷反見執豹文乃來田鸚鵡舌為災翡翠羽自殘
醜惡非可居才美邇禍端置身當何所材與不材間
貴寵安足希庶以盡吾年

其六

天網掩八荒翔走盡其旨大人操利刃揮網使奔逃
殺獲豈不多貴有疎釋條渾沌鑿已久胥庭狙復遙
刑書代附益權家紛蝟毛跬步置一筭奈苦動見遭
民窮詐轉出獸窘恣咆哮介者不慕飾胥靡豈憚高

無令自棄民生此全盛朝

其七

儒生峭崖岸抗顏論詩書
磨折周倫類直方向朋徒
吐辭厲信義皎日耀天衢
外表高潔談腹內蘊穿窬
命侶發瘞子探口出含珠
金椎碎腐頰青青歌應臚
聖言豈不偉反為行劫需
誦說苟非人階亂豈勝誅

其八

擊鼓以求亡疾馳以逃影
驅介以乘高騾蹇以求騁
揮刃喪其柄棄其夫其領
趣舍昧良圖存亡在俄頃

其九

軒后謁大隗蕭駕登具茨
徒御總聖靈中道迷所之
邂逅襄野童再拜稱天師
仲尼大聖人未敢輕小兒
神智有不通穉齒抱真知
咄嗟世路子恥問甘蓄疑
終身昧太行皤皤良足嗤

其十

民食美芻豢鷓鴣甘臭陳
西子豈不都魚鳥不見親
萬類殊所嗜物豈慕非倫
箕畢各有好况此世上羣
情欲孰為正參差何可均
黜智任自然悠悠葆天真

其十一

夸名非已有禍患在須臾
生命無延期昏旦有不虞

拂衣舍之去矯步升天衢陟降太微堂上帝授靈符
六氣備朝餐雙蚪結鸞輿消玉饋我漿馮雲構我廬
聖真進杯觴靈妃奏笙竽三光代列炬四海注一盂
抗臂抑羲和六龍且徐徐微瞬市朝易日月曷云除
名漏泰山錄鬼伯無迫驅舉手謝世人安能與爾俱

其十二

里中有一士栖栖蓬戶間動依高士跡居誦先民言
盜中無斗儲桁上衣無完藜藿并日得續絮豈禦寒
伏臘祀每廢妻子頽苦艱常恐志節虧不屑親知憐
天門四壁立顧之絕愁嘆饑食拒嗟來渴飲避貪泉

一 簞恒晏如回也稱大賢

其十三

姬旦制冠裳萬古承其貴偶以衣徂徠奔騰裂且棄
承雲本妙音鱗羽爭碎易魯門鐘鼓聲轉使爰居悸
物類何續紛人已非一致遘哉尼父言盍各言爾志

其十四

曜靈倏西沒圓景承其輝飄風蕩會雲零露忽已晞
急節不可淹大暮焉能違天象會有復嗟哉人命微
怵惕積湯火榮名非我希幸不嬰網羅何用起高飛
安接浮丘公執手升雲巍玉醴對坐傾瓊華聊可噉

其十五

京洛冶遊子浮湛聲色場青驪服文輿丹組縉羅裳
翱翔狹邪間順風揚芬芳高堂置廣宴曲榭開間房
分曹效百戲作使徵名倡良庖膾肥鮮珍饌溢圓方
朱華忽西逝蘭膏嗣其光客醉賦無歸宵分歌未央
為樂自今日千歲固其常安能轉多忌歎息懷虞殃

其十六

甘辭背德義盡言招罪尤效忠主未諒施恩誰見酬
直道鮮所合險路焉可由民生媚其朋玉石各有儔
舍此但安坐芳時忽我邁去來固成理乖合非人謀

灰心置計較遺棄親與讎去適無窮野超世離殷憂
其十七

達士志慷慨貪夫思保全有身則有患消散固其然
伏波甘馬革莊周快烏鳶用意匪一趣大要歸明賢
愚者闇桑榆鬱鬱坐自煎思慮損眠食恐懼懷冰淵
感邀向賓客劬勩終歲年多圖寡攸成繁辭累其愆
展轉不獲紓賫恨寢重泉木槿榮一朝日夕用長歎

其十八

河清不可俟川逝誰能止朝露忌太陽夕日愁濛汜
歌舞化塵埃都邑生荆杞大運厄陽九銷毀固恒理

填海精衛勞逐日夸父死齊景悲牛山晏嬰笑未已
彭殤孰短長無生悟方始

其十九

梧宮肆詰辯齊楚兵始連弦高犒晉師鄭國賴以全
齊樂不可犯范昭知有賢誰云制勝術乃在樽俎間
君子慎幾微禍福基一言覆水各自流事去誠可憐

其二十

疑似不可涉李下與瓜田毋言出婦口雖當未爲賢
周公功信偉二叔反流言實沈與閼伯日起尋戈鋌
骨肉尚不免何望他人憐夜玉至無因匹夫按劍前

鴟鵂據腐鼠仰視哂鸚鵡焉苟非明君子安能弭禍端
感彼采苓章勗哉其金旃

其二十一

處世悵悠悠結交誠草草舳艫濟重淵璣衡測穹昊
人心懷嶮巇對面施傾倒莊惠亦有疑張陳終莫保
托身恨已晚知人苦不早揮袂去人羣採芝歷雲島

其二十二

言笑色雖親致毒乘其昧一旦弛周防勺水成湍瀨
禍亂在須臾何有細不大牧視後者鞭蟋蟀思其外
舟壑竟難恃軒駟何足賴先民亦有言高明鬼所害

慶吊非異門 驕蹇詎能會

其二十三

元化運天地 碩輔須英雄 草昧若無侯 大業何由隆
匡時各有人 如雲附飛龍 二八贊虞庭 胥靡翊殷宗
周公出天屬 鼓刀應非熊 爲猷苟切施 疎賤靡不庸
下世欣舉肥 斤異多引同 豈乏個儻士 無媒終固窮

其二十四

僂俛信無當 躑躅常苦憂 傷哉世路交 同源終異流
執手愛不淺 轉面起見讎 傾側忍負欺 怨毒生綢繆
彎弓日相向 乘利來迫遒 薛公一獲罪 賓客誰顧留

炎炎廷尉門 灰寂令人愁 胡越使相爲 安危在一舟
輕薄市中童 反復誠獨羞 煩思發憤懣 自茲絕交遊

其二十五

日月亘天塗 照耀各有時 榮枯若循環 智巧難控持
賈生愁遇鵬 莊周殫爲犧 糾纏誰不嬰 文繡焉能辭
放言用自慰 虛無誠我欺 得失去來間 北叟迺深知

其二十六

昔聞有遊女 逍遙翔碧潯 交甫下請佩 解贈情亦深
可遇不可持 變化愁予心 影滅珮亦失 漢廣無由尋
眇睇絕髮鬢 徘徊逮夕陰 青鳥忽來過 貽我金石音

憂思耿難忘寫意於鳴琴自傷非儔類感激長悲吟
其二十七

愚公亦非昧智叟未爲得獻疑親反嗔贊詭疎爲德
大人計億代俗士愁日晷通蔽鮮一致損益非易測

其二十八

忽忽行欲暮遑遑復何之征馬立踟躕遠道安可期
霜霰被原野北風吹我衣孤鴻飛且號虎兕夾林啼
崎嶇不獲騁徒旅長嘆咨回車亦已晚失路良可嗟
嗟哉客遊子念此早旋歸

其二十九

窮達有自然鬼神柄其施安坐值滯恩周旋失所宜
佩玉乃不兆壓紐襁抱兒上卿屬稚齒郎署淹厖眉
巧宦目馬安斯言恐亦非豈無多智人往往困蒿藜

其三十

蟬螿不知夕楚楚矜衣裳人生若塵霧覩茲立傍徨
世事杳而至心力苦不遑運往悵莫追憂來嘆無方
智巧雖百出得失亦相當少壯與時逝精神自彫喪
逼此悔恨生稅駕名利場按謀訪芝草天路期翱翔
列仙非我儔瑤水邈無航俱置勿多畏恬澹安其常

其三十一

中歲獨玩世蕩志娛絃歌嬾變思一顧輕薄日來過
妙舞進北里姿媚趨俠邪資用每不贍謗議橫相加
茲年忽醜老譽禍悟已多昔人重知非慨嘆今如何
深身祛垢氛考室潛巖內不即徂謝庶得附龍蛇

其三十二

茲歲忽云暮駕言出城闈楊林翳白日岡岑蔽玄雲
荒原離獸馳寒鳥鳴索羣上有百尺臺下有千古墳
登高一騁望恩我平生親延佇久不至俛仰懷酸辛
萬物靡不化千載猶茲辰驅馬復來旋詠歌聊飲醇

其三十三

猗與雄傑士猛氣蓋八埏出身赴國難受命不遑安
左臂引烏號右手提龍泉臨敵試一呼萬夫却走還
先聲四海沸壁壘俱破殘旄頭化石隕天吳蟄重淵
西北淨胡塵東南蕩蠻煙茅土非所希貴使威靈全
長揖返故廬功高何足言

其三十四

至人處斯世忌為人所知十漿五先饋列子驚且疑
避竈不足貴爭席乃庶幾大白每近辱卑濁良可棲
豈效夸毗子作意矜容儀結束轉自媚恣態令人悲
緜塗飾軒轅步趨陳采齊危冠禮迂士褒貶厲嚴辭

媮媮不敢干矯志逃世譏皎潔難久居青蠅忽來隨
裏美孰云亮毀譽在一時敗軌屢相縈遺蹟當路岐

壯士篇

少年學劍術英風聞九州慷慨出門去辭家將遠遊
遠遊欲何之炎荒爲我仇昨聞遣飛將召募何時休
國威有不揚無乃壯士羞奮子如迅湍拔距踰亭樓
猛氣伏羆虎騰躍捷獼猴置身百戰場妻子不顧留
性命良足憐聊以紆主憂揮戈盪蠻煙飲馬江漢流
餘勇萬人賈雄傑無匹儔功成獻明庭賜爵位通侯

遣興三首

八方異風土百里殊陰晴夷夏殆天設終古難合并
權家但好勝持議垂羣情孤軍病深入問罪慮無名
客主旣不如師老功難成常恐強弩末遂令小國輕
安得長者言立談罷交兵皇惠均萬物各各遂其生

其二

南裔雖一區嶮阻紛可憑民居寄谿谷霧雨常晝冥
妻子像蛇虺魑魅冒人形沙虫潛射影觸之喪其生
古來稱絕域何足煩天兵吾聞王者師無戰唯有征
一卒不備歸良已虧威靈地於東南缺天乃西北傾
二儀有不足并包人豈能

其三

高宗伐鬼方三年乃能克不聞徐方來允在王猷塞
耀武與脩文收效孰爲得試看古戰場春雨生荆棘

眺江閣述感

偶遺丘中步來眺江上閣樹裏呂王城草邊邾子郭
遺官隱莫尋往牒恍難托春深苦竹滋秋高白楊落
故堞啼早鴉野田噪暮雀頗爲樵牧資烏兔狐鼠虐
雍門衰有餘九原何可作

雜詩九首

締絡寒不求續絮暑不御當其不知

時節忽復及效用乃如故冥運不無代物理豈常遇
功成互見奪乘時各有驚嗟哉團扇姬怨歌良已誤

其二

手持一杯水覆地東西流榮悴有自然萬卉同一秋
翩翩者誰子作色矜遨遊朝見馳華軒日暮歸山丘
憂來不可知爲慮何能周貪夫味成理磨折將焉求
天命無改施智巧誠足羞

其三

日月競馳邁一夕復一朝臨鏡失故吾壯心潛已消
聖朝棄賤士九牛亡一毛豈不希末榮所苦術不饒

無能令身貴何爲使心勞莊生誠我師太鵬寓逍遙

其四

獨處忽不樂理棹凌洪波巨石何澆潯魚龍駭經過
舍舟復安適改軌登山阿木魅號夕風猿猱一何多
禽虫饒怪形林谷聲相摩失路積憤懣逝景忽蹉跎
雲中可遊遨之翼將如何

其五

漢臯有遊女揮袖凌風翔俯身拾翠羽舉步振雙璜
芳華耀朝日皓質凝秋霜嫣然惑陽城婉變切中腸
將來恍惚旋何由置蘭房徒倚通精誠青鳥逝我

場聲致殷勤再爲申禮防徘徊湍瀨間綺麗不能忘

其六

無得亦無失喜來憂思乘崇高帶傾覆陳根吐鮮英
反覆開存亡臭腐含精靈如何聲利徒僂俛趨譽名
季子竟車裂累印何足榮李公具五刑悔令遊說成
賈主愆自招上書誰爲明萬事有不虞逍遙可長生

其七

芳春驟青驪遨遊楚江濱道旁若堂封云是呂王墳
衢路化陌阡臺館盡燒焚陰風嘯寒鷗古隧翔狐羣
牛羊牧其巔凌藉日續紛生存華屋居嬪妾從如雲

一朝寢重泉貴賤何由分
龐公困隴畝耕稼良已勤
誰知千載後史冊播餘芬

其八

中園種桃李不言下成蹊
凝霜被原野零落愁安歸
盛年有銷鑠窮達在一時
便嬛途路子俯仰乍榮輝
夸名何足賴怨毒常苦滋
靈龜歎在塗雄雞憚爲犧
膏火忌自煎斯言誠可悲

其九

羲和馭六龍馳光耀萬里
一潛濛汜間沉淪不自理
楚宮在昔時繁華照江水
歌鐘日夕聞聞謝屯羅綺

運徂謀亦屈巍構積傾圮
當畫狐兔翔洞房生荆杞
朝雲不可招逝者誰能止
流觀天地間庶悟達生旨

別張子言四首

我友駕言邁去去之朔方
晨起越中廚爲我具酒漿
長別在須臾且願盡杯觴
昔爲骨肉親比翼雲中翔
今當永乖違邈若參與商
出門異鄉縣居世如朝霜
世途轉傾側良會安可常
羸馬感人情哀鳴衢路傍
悲風振喬林瑟瑟傷肝腸
執手不能辭淚下霑衣裳
恨無凌風翰送子還故鄉

其二

故鄉豈不思臨發中徘徊借問欲誰須重與心知違
山海高且深見面未有期有懷今不盡相思亦何為
豈無絃歌曲調促今心悲立語未及終白日奄忽移
安得魯陽戈揮景使東馳

其三

馳景不少待客子何可留相送不覺遠行行至河洲
甲有雙黃鵠飛鳴諧匹儔驚風揚洪波散失馬能求
雌雄相背飛影響日以適鳧鶩豈不多嗟哉非我仇
願言樹萱草以解心煩憂

其四

煩憂動我神悲歌仍躑躅鬱鬱道傍柳垂蔭昔何綠
嚴霜日夜零枝葉不復屬四時相推斥變化一何速
俗子驚聲華世儒矜結束立身多所乖年命傷局促
子其愛景光抱道在白屋

別張子魚三首

斷蓬隨天風飄轉雲中遊豈不戀本根一失非我由
矯矯雙鴻鵠高飛命其儔獵子隱側目橫絕焉可圖
托身貴得士安卑義所尤之子遠行邁棄我不顧留
思欲並子濟漢廣無方舟

其二

鳴鹿在中野獲草求其羣嗟哉昔所歡一散如飈塵
虞卿棄相印擔簦狗情親悔吝不自惜義聲流千春
此道息已久遺響誰爲申子其懷璵璠慰我多苦辛

其三

霖雨積旬朔義和光不垂荆棘被廣野潢潦生中逵
客子阻遐征太息當路岐策馬從子去駑駿馬可齊
君羽等飛鸞我質類栖雞同袍異羽質去留長此辭

閨情二首

種木期息陰結交期得心與君初婚時安坐調瑟琴
繫我大秦珠貽我玳瑁簪攜手同車遊徘徊步春林
俯拾並帶華仰聽和鳴禽折芳交贈持言誓一何深
寧期被讒妬棄我忽如沉曠歲不一接塵埃生錦衾
明月入空帷中夜坐悲吟發篋理故物淚下誰能禁
故物猶光彩故心人安在疇知恩愛移不俟顏色改

其二

端坐結憂鬱逍遙出中閨卅榮冒陽林流泉激清池
孤鳥西南征遺我鳴聲悲攬衣起相從迅影不得追
踟躕立庭隅日送浮雲馳雲馳風爲驅風返雲亦歸
君恩中道還慰我恒渴饑

別曹仲禮四首

與君一為別，碧度逝不停。奄忽二十載，親串日以零。
短者已物化，存者非壯齡。况復異鄉縣，散處如晨星。
但言長相思，豈意今合并。顏鬢各已改，不易惟茲情。
孤鴻號朔風，黃鳥聲嚶嚶。飛鳥戀儔匹，况乃稱友生。

其二

別子大河側，見子長江濱。對面但疑嘆，含意慘莫陳。
豈無新知歡，念此同袍人。扳留不須臾，義陽忽以淪。
奮身思繫日，天路邈無因。安能附高翮，一舉摩青旻。
飽者豈念饑，貴者羞賤貧。薄終古所尤，交誼貴在伸。
故心苟不移，何必會合頻。慷慨卽長路，無為兒女仁。

其三

中夜起相送，白露塗我襟。低頭惜分手，舉頭傷辰參。
斗酒良不薄，對之不能斟。唧唧草間蟲，助我揚悲吟。
為君拭綠綺，彈作清商音。物理關人情，淚下不可禁。
谷風刺小怨，孔公贊同心。延陵輕寶劍，高義垂至今。
親交信不薄，先民良可欽。

其四

冷冷山下澗，童童山上松。磊磊澗中石，瑟瑟松上風。
波逝石不俱，颺奔松莫從。物理相倚藉，動息難可同。
與君遊宛洛，矯若雙飛龍。中道悵相失，末路欣此逢。

既逢不須史去復當嚴冬霜霰集銜輓虎豹啼林叢
子其慎桑榆勞謙以令終

園亭言懷

駿死骨誰市象焚齒自累棄置悲團扇齟齬嘆方枘
恥隨荆橘化樂與魏瓠棄素無金張援馬取丘園賁
農圃行世業桑麻綜歲計實飽三士桃芳引八公桂
春原露未晞秋臯霜已被偶緣物態感遂與神理契
畧度無能淹金石亦善敝頽言齊得喪庶以紓勞瘁
歲暮雜興十首

年往志亦減譽來毀乃加遂初困無悶善後生有涯

永年慕樗櫟存身悟龍蛇人隱但城市嘉遯豈烟霞

其二

孔公深贊護賈生虛忌鵬屈伸在一時憂喜本同城
河清豈能俟途窮安足哭久息漢陰機莫問成都卜

其三

一斤壯齡改相知白首疎干時計轉拙好客資苦無
飯牛當落日牧豕入平墟行年忽老醜何意逐名譽

其四

人情皆喜新世路惟嘉壯鵠寵遠見珍薪積後居上
前魚龍陽悲遺簪少原悵盛年亦有移溢恩何可仗

其五

寡欲處易安抗行俗難合巢林祗一枝繞樹猶三匝
竟日伯陽書經年幼安榻閉門客座空啓徑朋簪盍
其六

昔惟樂遊行今已識耕耨連畛東陵瓜一頃南山豆
坐爰林壑暝歸晚妻孥候倚樹見墟煙就枕聞山溜
其七

日月處無恒俛仰情非一蟠泥乏龍德悅草愧羊質
周周尚慮危鷄鷄猶慕匹紛紛馳突子何不虞顛躓
其八

偏才互短長名家殊去取連城償燕石千金享弊帚
不識東家聖翻謂西施醜定價豈目前知已俟身後
其九

讒毀行見迫愁思坐不開含垢長者仁懷璧匹夫災
在鳥愧能言處木其不材終謝金籠閉幸免匠石猜
其十

景曜一何速志業百未酬所願則學孔吾衰不夢周
智愚各有營貴賤孰無憂松子久我欺萱草爲誰求

海

海

